

四庫全書

集部

欽定四庫全書

閩中十子詩卷二十二

明 袁表

馬熒 編

王檢討集一

五言古詩

感寓

吾聞上古初渾灝本一氣羲皇肇人文龍馬颯已至軒
鴻垂衣紳唐虞臻至治槽巢邈以遠黼黻日云貴云胡

欽定四庫全書

閩中十子詩
卷二十二

蒼姬還玄酒薄真味鳳衰其如何寥落匪一世

其二

雙精激飛輪循虛節驚至逝川無迴波千秋倏如駛浮
生日及榮孰與喬松齒君看邛山墳累累正相似鵲鳴
羣芳歇大暮同歸矣誰知清濁間中有恒不死

其三

團魄載陽燄終古無虧盈因人示肫肫側見死與生蟾蜍
薄陰采顧兔潛其形何當凌倒景一覩天地精

其四

璇穹垂至象衆曜何煌煌能符調庶極帝車幹陰陽晝
夜無停機所職各有章蒼精奉東壁神虎屯西央淵淵
北辰尊穆爾居其方司契古有成無為位彌昌始知羣
殷牧共戴君為王

其五

素琴絙朱絃中有流水音連城為之彈太容發哀吟仙
人空中來鸞鶴翔幽岑斯意不可述江漢清且深

其六

中堂發駕辯清聲間陵阿鄭客一在坐自以延露和至
音久寥寂窳靡世共佳俚耳不可尚子瑟將奈何

其七

驅車首陽下望古懷清芬斯人久已化令名今尚存讓
國就倫命殺身以成仁如何有干駟寂寞身無聞

其八

端居閱玄文云是古苔編中有羽化術鍊服可延年中

夜養玄牝積虛成自然
朝餐沆瀣糧夕飲玉醴泉
東邀青童君西揖金母前
笑攀若華枝頰見昆吾顛
茲事苟不繆吾將命吾旃

其九

真人趣恬漠澹爾中若浮
無心亦無為日與至道游
羣生接為構水火關不休
軒轅赤水珠須以象罔求
寥寥六合間可以命虛舟

其十

太白夜食昴流輝燭天街精感動穹漠君心寧元懷白
壁忌暗投徒使按劍猜所以狂接輿鳳歌歸去來

十一

玄穹貯幽默至理何寥寥良竈潛一機迴薄如旋飈
嫫媿妍媸殤聃詎遶遼張生既中廢單子亦外彫所以
塞北翁頗識理亂條云胡徇物者汲汲徒內焦咄哉感
吾衷長歌且行謠

十二

龍虎啓晉伯熊羅兆齊封豺聲餒敖鬼牛禍成庚宗廢
興自古來吾將訊其蒙蒼旻本何心至理元冲冲

十三

羸皇魑威武漢帝非仙才玄闕祕靈府何處求蓬萊終
餘鎬池壁空獻新垣杯但見三泉下寶衣變寒灰

十四

大庭昔酣醉遺此釣天章遂令鷄首墟虎視吞八荒羸
基苦莫敦所恃逾兇狂詭命終見奪百二空蒼涼

十五

金行昔弛馭兵戎，偏神州宮闕被荆棘。
狼竄走王侯，蹴踏五都裂穢濁。
三精收上天，實禍淫所佑。在祥休豈伊，
否泰運一氣。恒相適，經過覽故墟。
落日黃雲浮，冥穹不可訊。涇渭方安流。

十六

商君挾三術，西遊說秦君。上陳帝王略，邈以寧見珍。
陽春信寡和，下里迺得親。孔轍七十週信哉，無停輪。
我有

縈絃思區區向誰陳

十七

番番南昌尉不知名位卑上書抱區區忠懇何由知靈
鳥鳴朝陽莫為世所希終然吳門市散髮招鷗夷

十八

蚩尤卓長空漢兵出陰朔材官三十萬旌甲蔽墟落長
驅破輜輶萬里靖寥廓朔南無王庭功成衛與霍誰知
青塞月白骨照沙漠

十九

玄精格至理寂感通幽明造化雖甚微焉能外吾形飛
霜激齊臺振風揚楚庭庶賤尚復爾況與至道并聖功
極中和二儀為清寧緬彼歸昌音何時復來鳴

二十

秋氣肅萬物嚴霜下空庭不惜百草晚惜此蘭蕙傾祥
麟一朝羈尼父為涕零大運固莫測聖哲那能營容成
安在哉遠跡良冥冥

二十一

艷色不足貴所貴在適時
昭君傾國容遂為丹青欺
蛾眉嫁單于一往不可追
至今青塚月夜夜令人悲

二十二

玉麗不盈把德輝照四隣
段生曰偃卧迺能蕃衛君
澆風薄士節自碎明月珍
求蟬貴明火俛仰懷古人

二十三

闌居嬰世媒局束無安步
石火流狂飈憂來鬢成素
誓

言濯吾纓釋此出門去臨流弄滄浪升丘引遐顧仰羨
雙飛鴻肅肅在雲路

二十四

蘭以薌見焚膏以明自煎高才信非美賢知成禍愆龔
生蹈偉節楚老有遺言清風雖可希惜哉天天年

二十五

直木忌先伐甘井忌先竭何為抱區區昭如揭日月至
人善閉關埋照慎不發入獸不亂羣虛舟任超越襄野

迷帝軒汾陽枉堯轍棲心玄靈臺可與人世絕

二十六

春至百卉生感我池上情折芳玩新綠臨風為誰榮
忽樹合歡忘憂樹萱草忽蠲憂亦忘希夷自為寶

二十七

幽居玩羣生小大俱物役嗟嗟羽族微擾擾亦何極
鵜共聯羽精衛勞木石何如三青禽翹尾戴勝側

二十八

庖丁擅操割目行神為虛三年無全牛投刃剗有餘淵
情妙至理豈受外物拘冥筌苟不棄安能得神珠

二十九

凌晨採琅玕泝彼洛水涯倏然有神遇綽約見令姿投
我以珮環却致交甫辭艷色豈不姣贈賂良亦稀但恐
結褵好中道有所虧

三十

天天園中桃灼灼映綺窻窻中有織婦顏色如青陽三

年弄機杼七襄成報章成章欲何為願以充君裳但恐
不見察徘徊空感傷

三十一

繁條蘊徂謝清宮媒炎寒涇陽擅秦寵豈得長交歡一
朝成遠間歛怨東出關昔日天桃華今同秋草殘所以
龍陽魚痛哉涕汎瀾

三十二

富貴千里合貧賤促膝離骨肉尚云爾何況他人為不

觀寶門士請看閭庭綦翟公何為者謝客無乃遲

三十三

析龍敏辯給惠施夸便儼竹書信激詭堅白方自賢
滕口徒見尤胡能事幽玄九州誰復徵多方亦已然去矣
桃李蹊余將欲忘言

三十四

翩翩遊俠子出入咸陽城千金買意氣五陵交弟兄袖
中徐匕首拂拭秋霜明十步殺一人千里不留行世人

矜勇智中貴聯芳聲末路賤行檢此輩方縱橫至今季
布死尚識朱家名

三十五

折盤引菱荷激風和結楚皓齒揚修蛾清尊間芳俎三
川美少年五陵遊俠子取樂不知疲但畏韶光阻焉知
董生帷心妙在千古

三十六

我有太阿劍龍文粲奇章精文動星斗揮霍迴陰陽淬

以金鵲鵲衣之古盤囊夜深雷雨驚恐逐風雲翔剛明
易點缺貴能歛其銍用之如發矧保之在深藏去去勿
復道相期霄漢長

三十七

齧膝志萬里蘭筋何權奇長鳴一見馭蹀躞遺風追伯
樂苟不值曠世誰能知離離玉山禾曷慰渴與饑八龍
眇何許宛足長相隨

三十八

東園桃李樹灼灼春妍華佳人不再摘芳意其如何白
日每不退流光竟蹉跎大運苦難遇感此哀情多

三十九

孤鳳久不食所志金琅玕喧呼百鳥中東翮歛羽翰會
當覽德輝飛下青雲端虞廷方見待阿閣當空盤誰令
抱威儀局促風塵間

四十

宋人得燕石自謂璫與璵徒勞十襲重見哂周大夫流

俗久繆悟美價恒異沽所以卞和子抱璞空長吁

四十一

公軒處懿鶴白屋譏千秋萊施盈高閣申椒拚荒陬
頎頎東方生虛為歲星遊方將猿鶴化豈為沙蟲謀
歸從紫泥海再弄清淺流

四十二

照影莫唾井種葵莫傷根傷根葵不生唾井隳明神樂
生北去趙由余西霸秦壯士感知已鄙人惠私恩止止

且勿哀千古黃金臺

四十三

昏壁中始見烈風號北林飄飄遠遊子中夜抱單衾繁
音激楚奏清商悲越吟豈茲異鄉感兼之年歲侵胡為
苦行役薄暮猶駸駸

四十四

四時有代謝千古誰成功昔時東陵侯今日瓜田中雄
劍且勿悲凱順天地同武安豈不偉掩襪終何庸

四十五

桂樹生高嶺揚芬散天風濯濯甘露滋泠泠被芳叢託
根既得所衆卉匪與同幽蘭獨何為頗類荊棘中

四十六

楚夫重鵠夷詭作丹穴招鷗飛東南至文羽不見邀一
鳴旭日升再弄律呂調蕭臺有練實歲歲翔遐霄

四十七

世人競功利志得靡暫寧邠生事薄遊匆匆懷蘭馨游

心不滯物泛若浮雲輕豈徒漆園傲百世同高情

四十八

微禽變淮海流光迅驚湍人生豈不化徒結千載歡昔
為金虎臺今見荊棘攢碧海不可蹈紫關邈難攀誰邀
箱丙馭去覓無窮源

野田黃雀行

黃雀何翩翩羣飛野田側飛鳴自相呼飲啄仍共適誰
知遊俠子張九事彈射腥軀薦鼎俎腐壤委毛翮微物

何足甄感念在疇昔蔡侯富游盤行樂方未極安知子
發至一旦殞其國至哉莊辛談可以長太息不覩黃雀
哀千秋復何益

結客少年場

玉勒驕驍驕寶刀耀星芒相逢關雞里結客少年場探
丸殺公吏白日醉咸陽司隸不敢捕意氣凌秋霜一朝
許報國投軀赴邊疆喋血匈奴庭萬人不敢當彎弓射
月支斬首得賢王歸來不受賞出入金殿傍輕脫季布

死却哂聶政狂鄙哉汗陽石不使俠傳芳

今日良宴會

三川富豪雄濟濟美少年驪遊及芳歲鞍馬何翩翩秦
箏奏新聲妙舞妖且妍今日良宴會意氣如雲烟人生
若朝榮灼灼寧久鮮無為坐坎壈流光悲逝川

置酒高堂上

置酒高堂上豐厨出鮮肥廣筵羅衆賓清尊間蛾眉羽
觴若流星絲竹清且悲陽阿屢迴雪結楚超蘭猗畫盡

繼以燭取樂良未涯流連豈不荒所慎白日移一朝委
山丘琴瑟將奚為嗟彼蟋蟀詩母為世所嗤

車遙遙

車輪何遙遙西上長安道不見車上人空悲道傍草君
行日已遠思愛難自保憂來當何如一夕夢顛倒豈無
中山酒一浣我懷抱但恐三春華顏色不再好車聲何
粼粼風吹馬蹄塵願隨馬蹄塵飛逐君車輪

苦別離

瑤瑟對玉卮中有千萬思欲彈再三歎多是苦別離妾
顏如秋華零落方在茲君心如逝水一去無迴時皎皎
雲間月幾見雲復缺月缺有圓時君胡苦離別

步虛詞

東華青陽君授我寶篆文六角祭星芒讀之了不分謂
之藍珠篇玉檢浮空云持此可度世出入齊化鈞再拜
服至言歸來嗽芳芬火粒一排棄永此偕仙真

其二



卿雲爛沖霄祥景啓大羅紫微穆虛皇太清為我家鏘
鏘八琅璈和以希夷歌一氣但浮衍至道良不頗頗觀
區中緣蜉蝣競眷華天濁不自愛真意其如何

其三

精心仰真範稽首朝玄都祥氛結靈宇雙闕浮太虛離
羅古仙人羽駕紛來趨冥言感至理道化超羣無口吟
三洞章身佩五嶽圖真詮諒斯在邈矣浩劫初

其四

瓊臺瑤圃西弱水扶桑東
飈輪歛上征八龍儼來從
整佩訪金母弭節朝玉童
津津九霞觴粲粲方諸宮
授以至道言所濟良無窮
却馭俯倒景八表空冥濛

從軍行

投筆出虎觀從軍事龍韜
平生弧矢志誰慚五陵豪
大江天宇晴平明集千艘
組練照雲日戎師候旌旄
一笑挽弓胎三杯拂豪曹
酒酣意氣重萬事輕鴻毛
袖中黃石編可與烈士高

其二

上將躬受脤鉞專南征熊羆百萬師長驅下青冥五
嶺息瘴癘三邊讐威靈指揮動星漢嘯咤生風霆洗兵
當載橐斬馘期弗爭上以宣國威下以甦民生周詩有
遺什敢不滋令名

遊仙曲為張真人羽化而作

祥雲凝素華初景麗璇霄羽駕集萬靈上下何飄飄杳
眇笙鶴音和以空山謠塵緣一洗脫頓覺形神超下士

盼末光長跪不可招回飈灑雨至矯首空雲翹

其二

剛飈載飛軒上泝無始鄉心冥一氣表坐斷萬劫場茲
來食色身緬邈情俱忘長歌奮雲璈朗詠流玉章空明
結真炁晝夜何煌煌嗟哉下土家仰止徒悲傷

其三

晞髮九暘域濯足咸池津明明在天祖翼我登飈輪金
天謁西母紫府朝玉真朝遊扳曜羅夕憩適結鄰空同

仰真梵天濁漸下民因之一絨扎稽首黃麒麟

其四

化機無停輪萬有互始終至人出陶鈞與道相無窮大
庭儼羣仙羽蓋時來從逍遙玉虛境一炁每自同真詮
久云遼至理標鴻濛何時復降世清都振玄風

詠史

達人志莫測變化猶鵬鴟倏忽翔九萬虞羅空見存莊
生揮楚璧仲連却秦軍峻武薄層漢高情寄浮雲昔過

聊城側復經濮水漬餘風尚不泯肅肅來清芬

其二

狐白僅一腋勝彼千羊皮壯士出片言萬諾空奚為毛
生奉平原自脫囊中錐提攜十九人咤彼猶嬰兒一語
定從盟不待日昃時英風被廣座磊落誠可奇知人豈
不難長缺聲同悲

其三

丈夫一言合不論故與新傾蓋即相許白首如路人夕

為牛下士旦作齊上賓吐論即見收揚芳及後塵豈無
私嬖讒不能間其親虞卿起相趙五穀西入秦一旦魚
水歡舉屬䟽賤臣志士慕知己臨風一馳神

其四

讒言信罔極構亂成禍媒不有明哲鑒誰能知是非青
蠅一朝集白璧成瑕疵姬文不見明宋墨名為隳賢聖
尚云爾耿耿將誰為爍金不待燃毀骨痛莫追空懷素
絲志寧却貝錦詩白圭懷魏珠季子食馱馱膠漆苟有

契誰能為別離

其五

芝蘭生中林寂寞荆杞豈不擅芳芬乃與茝蕪齒丈
夫昔未遇憔悴亦如此范睢快仇敵蘇秦笑妻子淮陰
出胯下相如困泥滓悠悠世俗態落落誰知己

其六

戍役赴關隴馳車經洛陽羣公翦雲集節鉞何輝煌炎
精啓初輝云定神鼎方顧瞻渥澗瀕山川蔚蒼蒼脫輓

棄道左躡履整敝裳叩軍陳便宜炯目如曙光折此利害端吐論何軒昂咸秦古天府百二誠帝疆丈夫鏡時機識此理亂章一語棄貧賤笑談綰銀黃此儒竟何為空守蓬蓼場

其七

賈生洛陽人年少有遠識當其痛哭時漢祚如磐石其言實非狂四座為動色抱火厝積薪寢食方自得長沙卑暑地自古舞鯢窄吞舟詎能容驥足誠窘迫弔湘見

微志感鵬成太息後恒古云客夫子亦何極駑駘服上
裏駟駟棄道側卓哉治安書遺耀在簡冊

其八

昔人有奇策折衝尊俎間何必百萬師出入無時間司
成久不作晏嬰邈難攀廟勝久已非徒興聖父嘆莫酬
突徙薪賞及焦面顏神功貴無迹此道良獨難

其九

三卿譏世及孔筆繁若星尾大恒不掉拊枝攀根榮炎

光脩中微五豎並列庭禁兵設蘭綺金影貂長纓私門
填萬軌指顧山嶽平龜鼎潛欲移擁弱徒虛名豈無賢
知謀發言炳中誠根蟠固已久大運終就傾

其十

彭薛志已卓貢公榮未遺二邨近止足兩䟽明見機朗
識洞在初何勞張措譏功成有代謝四序恒推移狂瀾
方橫流六合飄驚颶天損不我加至樂同希夷

十一

鳳躍難為枝龍潛難為淵驥足不一展百里枉大賢士
元困已委文舉類左遷苟足知己明虛為世所捐劍埋
風胡悲璞殞卞氏誓黃鐘雜瓦缶舉世方復然

十二

翩翩城隅雀所產得鷓鴣孰云小可臣殷祀乃忽而禎
祥不足恃昏狂禍之基番番無顏冠出語自聾期嗟哉
倪侯館得死乃所宜

閩中十子詩卷二十二

欽定四庫全書

閩中十子詩卷二十三

明 袁表

馬熒 編

王檢討集二

五言古詩

遊小雄澗壑有賦

陰島變殘雪流星吐溶溶偶尋一逕微獨與採樵同兩
崖濕花霧衆竅吟天風雲根濯苔髮亂篠相冥濛盤崑



折磴道似各冥搜窮石門忽中斷曠望開烟叢蘿雨澤
毛髮松枯清心胸了然青洲霞照影寒潭空始知人境
外別有仙源通振鳥揮片雲投情依遠鴻玄棲極杳眇
神遊小崆峒真仙金鷺葢一室丹火紅勅授紫囊訣永
期鸞鶴蹤却憶望城市白日氛埃中

尋小雄仙詔二龍潭值風雨歸草堂作

昔人洗玉髓幽洞驅龍耕丹成輟瑤耒成此秋水泓飛
崖夾兩鏡洞見雲霞生百鬼不敢啼雌雄常夜鳴有時

湍瀨寒幾曲流瓊英清秋墮蟾影白日聞雷聲偶茲訪
靈竒掃石窺清泠洗心盟鷗鷺濯髮解冠纓長風動懸
羅颯爽毛骨驚飛雨洒而至萬壑秋冥冥歸途裡桂影
了了心目醒到家興未已石室披丹經

登劣崩峯宿湧泉得仍字

翠微白雲裏逢秋思一登聳身躡雲壁飛泉搖古藤洞
豁海天際坐見萬景澄飲澗動羣鹿宴林逢真僧邀我
宿化城珠林懸古燈寥寥片月上悄悄天籟凝因悲向

城市塵髮秋相仍

水亭夜懷黃八粲林六敏

孤亭水雲深人境自幽絕
七絃罷鳴彈桐陰初上月
偶酌尊中醪高卧望雲闕
荷露清角巾松飈濯毛髮
寥寥天籟寒吟詠了未輟
志偕南阜隱興藉東山發
同心念離居中夜思超忽

入西山訪張隱士

兩崖噴飛瀑結屋烟蘿裏
山人不冠履客至同隱几
獨

鶴海上歸孤雲澗中起淨掃白石牀風來墮松子

晚至石潭遇孤鶴懷仙

洞口拾瑤草石流正淙淙尋源信輕策一逕披鴻濛攀
緣雜花島亂聒松桂風石牀留片雲玉鏡莓苔空少焉
羣壑靜落景明西峯獨鶴何處來舞影寒潭中因之想
長馭乘化入無窮

遊清源別後寄溫陵田處士

夙性慕玄賞少年復離羣囊書不得意菽水懷親恩請

纓卑任俠點筆徒工文腰間脫寶劍歸卧清溪雲擢歌
有時閒放浪滄海瀆雲木秀孤島石壁澄霞紋茸茸紫
藤花濯濯數泉根鶴影波上歸龍吟水中聞興來拂瑤
軫蘭情灑餘芬曲罷劃長嘯衆籟清衣巾夫子弄玉簫
邀余醉瓊尊紅泉看洗藥碧澗思垂綸區緣一以蛻恍
若超埃氛別後緬靈境中夜飛吟魂昨夢紫峰岑月色
何紛紛清光阻天末眇懷猶為君挂我手中策拂我衣
上塵明當營丹砂去與壺公隣

晚至囊山寺

蒼山入踈烟狀若土囊決振衣秋磴鐘投烏化城月天
吟動風籟霞想陋雲闕沈沈慧燈影了了見毫髮余生
值多故所性慕禪脫偶偕真僧期始若妄緣絕冥心依
覺場度世賴慈筏誰能量虛空澹爾離言說

自牧居士與玉壺道人古囊善復二師共結三
生之社書來與余論老釋二書遂用畲之

觀空泯羣有崇虛悟真玄微言掃煩障妙契排冥筌況

之憩遠跡邈在雲蘿巔空香出人境花雨來諸天三緣
等無生衆妙同自然喻心了無取濯濯如青蓮裏城除
害馬祇舍留真詮願君解明月示我浩劫前

遊清源山道院

仙人有奇觀雞犬白雲裏春至桃花開千枝映流水星
壇藥草青夜室丹光紫天上期鶴笙人間識鳬履伊余
倦俗流十載困泥滓久意期大還乘風一來此金書啓
真秘石洞洗玄髓河車信可營心期羨門子

登薛僊峯書懷寄自牧知已

少年學劍術，穎脫神鋒生。身閒韜畧書，吐論吞從橫。旁
搜百家言，復得夷鞅情。自顧萬人豪，不慚一代英。擔簦
赴神州，十上空無成。巍巍黃金臺，邈哉阻天庭。歸來守
故墟，索漠羅秋螢。作書謝知己，閉門絕浮榮。悄悄林下
居，一室有餘清。間尋白社約，或作青山行。傲吏期解冠，
漁父同濯纓。縱酒竹林逸，尋仙松子盟。匣中雙寶器，棄
置蛟龍鳴。偶茲凌丹梯，足下雲霞昇。孤鴻天外出，白日

波上明九節菖蒲花採掇延吾齡飄飄羽人居蛻骨遺
玄經吸景若可弄丹砂思一營惟君抱孤絕襟懷洞春
冰相期苟有志雲鴻極冥冥

與鳴秋趙山人夜宿山居述懷有贈

塵居厭湫隘抗節慕遠遊道逢遷喬侶假以雙翠虬周
覽六合虛闌風不可留茲山富形勝歸來事玄謀紉蘭
理初服飲水期前修芳盟及歲晚世事輕雲浮伊人負
奇抱泛若乘虛舟斂跡三十年不應當世求高齋探玄

默衆妙窮冥搜有時發逸興登臨眺高秋鳴奕送天籟
酌酒環清流朝尋蘿谷曉暝期蓮社幽布衾清夜闌款語
相綢繆沖懷薄華組心跡同悠悠青楓落遠磴芳蘭蔽
層丘不見溫白雪非君誰與儔

送陳貢士

陳生江海士跋履當豪門五侯少知己倚劍思平原海
國一相訪別余歸故園杯銜霜夜月袂拂秋山雲四望
大野空蕭蕭鳴鴈羣意氣但自許離懷何足論



送黃紀事濟

寶劍雙轆轤，
吐青芙蓉臨歧一脫贈。
恍若騰蛟龍，
君行感我懷。
起視雲海空，
百年閱幻境。
萬里吹飛蓬，
登天覽餘暉。
孰挽濛汜東，
詩書古有立。
貧賤道何窮，
常希日月私。
獨負雨露功，
長卿卧茂陵。
不為世所容，
季子黑貂弊。
當年怨秋風，
丹塗困布衣。
渭水悲釣翁，
山松落澗草。
海鶴羞樊籠，
大運自古來。
俛仰那能終，
感茲不成歡。
別去何匆匆，
城南登高丘。
眺遠情所鍾，
一水瀉寒練。
斷雲

引歸鴻中座擊筑心醉吟氣頗雄興落遠天碧思染秋
山紅睽離自茲始夢繞青林楓

永思堂

茫茫宇宙內蕩蕩成古今淒淒霜露繁惻惻遊子心終
天何漫漫長夜竟沈沈庭闈不復趨宰木風滿林林中
有啼鳥嗚嗚吐哀音感茲物性微我懷良不禁入室若
有見君蒿或來臨區區抱遺體戚戚幽怨深嗟余年弗
髦多難早見侵為君賦永思潜然淚盈襟

夢萱堂為孫進士子良題

堂前種嘉草端以忘親憂我憂何能忘愛日遲此留如
何一朝變庭樹驚高秋悲風委殘綠薄暮寒飈颭緬懷
堂上人欲展情無由慘慘隔下泉冥冥閉荒丘惟應中
夜魂庶以慰永愁

其二

中夜有遐思寤寐忽見之覺來起徬徨四顧令心悲是
時返哺烏方遠庭樹枝微禽果何知亦各懷其私念我

罔極恩欲報情何施
鑑惟月娟娟動慢風
淒淒驚哀不成章墮
涕雙漣洏

其三

白楊風蕭蕭日夕來
古道不見堂下萱空
吹墓門草緬懷疇
昔時如何間音儀
入室若靡至出門
當訴誰上山有巔
涉水水有涯傷哉
陟屺心永作終天
悲

其四

日沒晨復旦海落潮
再生如何長逝魂
終天竟冥冥長

風振林柯颯爽久不停心將寸草折淚逐衣線零倚門
不可見登輿竟誰榮向應椿與梓頽仰當中庭

愛日堂為陳編修全賦

羲和整六轡晝夜無停機青陽方屆候朱火倏已馳壯
士感芳歲佳人惜流暉懷哉孝子心視景起徘徊奉觴
庭闈趨喜懼恒共之去日不可留來日方在茲中堂絃
筦清疏房帷幄垂誰揮魯陽戈為我駐四時

節婦吟為上虞黃氏作

初初寒日暝嫋嫋秋風涼淒淒卷素幔切切悲空牀昔
為雙飛鴻今作獨宿凰妾身豈復惜子幼姑在堂捐生
諒非難老稚誰扶將日月良有食海水良有極妾身千
萬年當化山頭石

虛舟

剡桂破崑玉剗蘭移楚芳濟深良可憑橫淺徒自傷偶
值蒙莊叟無心寄大荒

山城寄郡城諸生中

還山見孤雲悠然與心契素絃橫石牀泠泠寫秋意却
憶社中人寥寥在城市

歷峯蘭若宿偉上人禪房

烟林晚蒼蒼白石開禪扉閒中叩幽寂恍似東林時大
千息羣動水月破陰霏出世逢真僧允矣旃檀枝空香
出深竹梵唄諸天隨真源寂無取化育潛一機嗟我食
色身未能釋羣疑嘗希妙高聚洞豁杳莫窺因心了衆
幻稽首成皈依

秋夜齋居懷唐泰

高梧月未出，暝色疎烟裏。
雖鳴鴈來聲，在秋塘水孤。
燈捲簾坐，寒影對窗几。
青空吹微霜，瑟瑟動輕葦。
援琴不成音，感別在千里。
誰值晨風翰，淮波盼游鯉。

寶山蘭若

山門隱松桂，花雨浮半空。
金仙青蓮居，乃在烟霞中。
石竹覆紫苔，四壁泉濛濛。
因窺一燈影，宴坐萬劫同。
衆籟清梵音，浮塵愧微蹤。
願言別苦海，永矣投禪宮。

登仰山一覽亭

久懷名山遊偶宿翠微寺化城依寶坊累劫即初地心
空萬籟寂夜久衆壑閉寥寥水月觀了了獨忘寐凌晨
覽孤峯更在白雲際躋攀興未已恍惚身若寄危欄條
而倚曠望海天細松際見鳥巢簪裾落烟翠惟時物候
肅千里軼纖翳神行極空濶豁爾心目霽翩翩鷺鶴影
冉冉芝蘭氣浮蹤浩天遊蟬蛻隔人世顧余眷名籃似
與夙緣契因偕緇錫侶尚覺章甫累便當脫塵纓投情

緬靈異

兔峯孤月

靈鵲墮寒羽清輝澹溶溶誰將一片秋絳向溪南峯蔓
壁落金鏡陰窻鳴夜桐幽懷迴未已杳靄東林鐘

鶴峯閒雲

前溪孤嶺秀旦夕浮雲陰暝結鳥巢白靚連蘿萼深蕭
蕭丘中賞游心在鳴琴悠然太古調相期鷹鶴岑

龍寺寒泉

靈源沁寒泉乃在翠微頂中有修鱗蟠白日烟雨暝山
僧習止觀木客照孤影余亦洗心人生來白雲冷

塹石歸樵

旦出事斤斧薄暮歸青林澗迷猿鹿引踏滑莓苔侵白
雲覆我頂山風吹我襟嘯歌靜炎燠邈矣烟霞心

漳溪晚渡

微鐘逗前林林端晚烟發扁舟去俄頃雲水坐超忽中
流離思靄天際孤帆沒日夕緬同心相看成楚越

瓜田寄南山處士

種瓜一畝間
榛蔓苦翳之
雨深苗未抽
惻然令我悲
清晨行荷鋤
芟刈亦忘疲
仰觀天宇寬
俯視羣物滋
却憶南山老
終年澹無為

菊逸為三衢金山人賦

結廬避喧俗
青嶂託四隣
乃知寰壤中
而有羲皇民
間邀白衣酒
坐對黃花晨
所樂憂患除
陶然任天真

其二



郊原掩窮秋孤思久寥寂賴此霜下英庶以見顏色開
尊命濁醪取醉聊自適坐望飛鳥還不見南山夕

畫馬篇為童將軍賦

聖皇覽乾馭天駟流星芒太乙貺靈異倏見渥水傍神
精何權奇意氣尤軒昂兩顴夾明月四蹄亂秋霜早為
汗血駒三載清大荒長驅奄上征逸態凌雲翔驍騰日
萬里脫畧誰能當歸來驂六龍殊恩擅中黃賜浴天池
津剪拂鬚鬣長顧影驕玉姿含嘶泛清商丹青寫餘照

對之亦騰驤駘世豈乏伏櫪空成行

晚宿雙峯驛樓與故人陳哲言別

山暝烟已斂林涼月初生扁舟薄江汜倏更欣相迎登樓引孤興開筵坐空明杯分劍溪綠簾捲雙峯青几席湛碧流蘭氣浮冠纓泠泠露叢鵲中夜四五驚偶因念物性終焉感吾情十年懷一枝三匝棲未寧茲晨胡為哉又逐孤雲征良宵一邂逅明發增屏營蕭蕭衆籟寒萬壑同時鳴緘辭別知已解纜搖行旌

讀書樓為四明王子沂賦

曠野豁烟翠層梯標石叢奎輝貫憲牖颯颯來天風良
宵清諷音飄落如半空雅調既云遠古心誰與同豈無
華構崇飛軒切層穹春風羅綺醉落日烟花紅詎知靜
心者兀坐窺鴻濛游心太古巢寤寐雲霞中榮艷適自
媚清芬在無窮

題畦樂處士成趣園

凌晨啓柴扉有客過我廬雕鞍照玉勒輕紈曳羅襦入

閒坐高堂騶從閑且都自言匪他人少小六郡徒二十
登漢朝三十執金吾五侯吐然諾七貴相追趨笑我久
淪落勸我無迂疎富貴不早致白首徒勞如而我聞其
言笑謝陳區區緬彼堂構姿安用散與樗以茲避軒裳
悟靜解天誅況云樂丘園取適自有餘朝寒邵侯瓜夕
濯鮑氏疏榮辱不我干憂患豈我虞閒心託浮雲不知
卷與舒客揖上馬去還歸倒一壺

其二



達生貴忘我守靜體自然外物苟不榮取樂無過愆鼎
食豈不甘軒裳詎非賢大功難久居盛名難久全淮侯
登將壇絳侯寄重邊寵辱一朝異殞替誰能憐寧茲遠
世氛寄身在中國間濯漁父纓時誦老氏篇適性乃化
初冥心超至玄知止幸不殆胡必誇輕儇嗤彼當世人
碌碌隨貨遷端居有真趣此意誰能傳

其三

勞生厭喧市養病閉幽樊角巾念何從孤興寄南園南

園曠且深春至卉木繁嘈嘈鳥雀鳴聒聒泉流喧呼兒
牽蔓籬殷勤難荒殘時雨倏已至佳蔬茁而蕃臨風襲
芳馨繞籬擷蘭蓀倦來聊自息支頤對前山載歌綠水
詞和以白石言東隣有傲吏邀我相與旋取意一自慰
此外寧復論

其四

稍烟吹林墟微雨被空谷雜卉翳層陂秀色宛如沐籬
落相逶迤鳥雀繞我屋行行出幽徑散帙寧見東濯纓

臨清流解帶絳修竹殘花明亂畦曲沼陰喬木神行趣
已恬理愜心自足閒情適虛曠空籟時斷續茲焉謝紛
擾亦以靜歆煥山風吹衣巾落日候樵牧顧同張翰心
寧事季主卜

晚至洞神宮

晚直下仙闕乘閒清道機福地集萬靈迢遙麗神圻入
門喧自息微風吹我衣烟林閉虛境密竹垂陰扉於時
東嶺霽素月流清輝妙賞愜初願閒心不知歸夜桐有

商意掃石橫金徽

遊靈谷寺

東城領遐矚北山開禪宮
松聲度衆壑塔影懸晴空
衣冠有時暇幽期白雲中
入水覓解流三生咏玄風
上人啓竺墳說法超羣蒙
是時寶花墜十里香濛濛
別來問玄度幾日還相從

楊進士新卜幽居

大隱在朝市蕭然小蓬丘
藥欄醉歌烏竹筵沿清流
良

朋偶而集雜花映觥籌遂忘簪組念頗似山林幽片雲
池上來傍我几席浮重遊未超隔佳會何能酬

與諸公同遊神樂觀

涼雨度高閣蕭條秋氣深洞門薄微寒逸興生前林道
人琳館靜開窻修竹陰詎因避書簡偶此諧纓簪掃石
鳴素絃遂忘名跡侵前山倏已見秀色浮重襟翳翳青
桑枝颯颯來遠音笑言欲遺返落景明西岑

畫菖蒲

晞髮慕遠遊端居閱玄文願言金光草緬此九節根芳
叢何歲蕤冉冉幽澗瀆溪雨濯秀色臨風動清芬當聞
嵩山客乃是九疑君採佩却百邪服餌諧仙真蓬壺翠
水區玄圃鸞鶴羣吾將整吾駕去與烟霞親

寄壺山道士

清溪幽且深猿鶴邈雲嶠中有冥棲士隱几若埋照我
昔從之遊遠落蘇門嘯顧余指石髓示以斯道妙其言
直而純梗槩領其要別來在風塵推轂中若燎未遂鴻

鵲舉將貽碧山誚因之寫雲緘日夕引遐眺

題林處士壁

荒居厭藜莠寂如張仲園閒來枕肱卧廓爾排真筌仰
觀浮雲生舒卷任自然綬無蕭氏結冠之貢公彈暝色
起修竹寒光流遠川因心玄冥子共樂壺中天

寄題吳大僕鑑滁州皆山軒

環滁富山水秀特東南叢蒼蒼瑯琊峯削出金芙蓉芙
蓉夾天帳萬壑縈相向岩烟吹亂霏滅沒不可望昔人

五馬來笑舉青霞杯雙旌舊遊處石徑滋莓苔至今餘
松聲瀟灑在林薄絕巘瀉飛泉孤亭倚寥廓懿哉延陵
君此地懷清芬開憲引列岫坐詠醉翁文醉翁久不作
羨子有仙骨良時但開尊公暇惟駐笏雲生島樹沒雲
散翠微連壁月動海色亘若壺中天嗟余戀塵鞅青山
勞夢想為君發孤吟風泉寄遺響

秋夜同諸公神樂觀玩月

秋臨萬象空良夜寂如水了然東山月照影清尊裏塵

蹤厭汨沒緬此方悠然況之仙壇高俯瞰區中緣坐授
紫霞笙嘯引琪林鶴參差斗未橫零落露已薄朋簪諧
夙驩佳期感二難中思拂衣去永卧烟霞間

初秋夜坐寄王紋

輕颺生早涼孤館清興發桐陰落前墀遙空瞰華月方
此抱冲素況值清境豁濁酒聊自持瑤琴弄應闕知音
念牽阻咫尺不可越相思良未已坐見曙河沒

送張謙

東風變碧草積雪開紫垣都門集同袍酌酒送行軒劍
歌一何長激烈驚心魂丈夫顧義分豈為兒女言名駒
出幽隱枳棘鳴祥鸞千年值嘉運萬里期騰騫

其二

崑山固多玉抵鵲良可悲羣龍方盈庭子行獨何之空
懷徑寸珠粲粲五色輝相投不相矚魚目其同歸至寶
豈真秘良材終見希誰能辨瑜瑾遲爾黃金閨

其三

醉呼秦淮酒臨岐歌慨慷吳姬小垂手一曲春風長扁舟不停橈去路但茫茫青山入楚甸白雲思越鄉豈無壯士懷擊節心飛揚憑將繞朝策一贈囊中裝

其四

海鶴青雲姿豈解司晨鳴時來暫斂翮終當遊太清奔鵝復何知開口笑沈冥饑來不飲啄再啖長風生請看昂藏軀寧與雞鶩爭維應瑤臺鳳可與蜚英聲

其五

故人發白馬翩翩臨路歧腰間脫玉劍贈子表相思霜
缺爾勿彈狂歌欲為誰英風灑毛骨四座驚別離別離
豈足惜意氣方在斯何當凌九萬並駕青雲螭

投胡學士

撫劍坐中夜長吟思一彈彈之有餘音激烈摧心肝出
處分以然中道敢不安但恐春華衰白日凋朱顏伊余
羽翼微宜棲枳棘間清樾苟自適孰能事鵬搏那因遇
知己刷羽排鵷鷺雲霄一翱翔九萬期風湍昔似丹穴

離志薄金琅玕今如涸轍鮒鬣空摧殘有沫不自濡
焉能禦所患淮山饒桂枝楚澤有芳蘭欲去戀明主引
領徒悲歎故人把天瓢豈憚一滴艱願因終號呼庶以
脫險艱毋令東溟使仰候西江瀾

送僧歸越中

錫挑龍河雲衣帶越溪雨說法方西來隨緣復東去松
枝偃故房栢子落庭樹從此上方遙人間但凝佇

賦得幔亭峯送張員外還閩中

秀色照海甸百里青嶙峋衆山如游龍一峯高出雲昔
傳武夷君於茲宴曾孫鸞飈載河車來往何繽紛羽蓋
云已久玄賞今尚存夜深天籟寒猶疑鶴笙聞而我昔
遊覽望之隔塵氛天影瀉潭鏡翠壁明微曛別來區中
緣汨沒推心魂茲山不可見夢寐懷清芬張侯有仙骨
幾年在雞羣中林赤松期久負瑤池尊斯行問初服訪
古清溪濱幻宇結空翠層崖閉氤氲歌九曲來餘聲
振衣巾玉女或可訊為余謝仙真

送劉太守之任福州

海國變民俗君行領專城千室豈云小所志在蒼生烈
士慕知己浮人歸頌聲驅馬登古臺覽望窮滄溟山雲
拂露冕海月生霞旌鄙人舊茅屋桑梓連雞鳴溪流九
曲水門掩三山青異時偶樵牧此日慙簪纓因茲送君
去悵望難為情

送林少府還九江得月字

握手白下門棹歌莫催發且沽玉壺酒共醉金陵月明

日望匡廬孤舟坐超忽

齋所示同宿諸寮友

華館敞清夜空香靄氤氲孤懷湛如水因之絕垢氛城闕度疎雨河漢霽微雲明發奉禋祀坐待禁鐘聞

龍江阻風寄同院諸公

客心疾如飛咫尺隔大江長風夜半生濁浪曉來降戀闕情豈緩望鄉思彌切且呼一斗酒坐待艫頭月艫頭月漸明抽簪散長纓潮生揚子白山出石頭青却念攜

手好如何寫懷抱明發烟際帆萋萋但芳草

宿釣臺

高臺薄層霄仰視烟霞深羊裘昔何為遺身在雲林
宮久荒涼霸業成古今飄飄釣臺絲尚爾清煩襟幾年
倦羈旅扁舟宿溪濱折芳欲有酌灑酒絃素琴臨流恍
中夜霄漢星光沈

過武夷約遊不果

武夷為閩望山余十年三過其下期一遊而

屢以事阻世傳蓬萊方丈去人間不遠顧非
有仙風道骨者莫得而至焉是則茲山之靈
異余輒將以塵跡混之宜其迴轡返嶂却我
於風塵之表因賦此詩尚俟後遊果於何日
扁舟下溪口薄暮烟沈沈羣峯暝色厚九曲
寒流深不見幔亭君徒懷笙鶴音雲霞結飛
夢風雨生平林牛生慕名山十年阻登臨長
懸紫宮戀未遂滄洲心豈伊真仙源避我塵
跡侵回橈發長嘯起坐鳴吾琴

宿分水關

凌晨起芻秣驅馬白雲間
倒窺猿鶴岑薄暮宿層關
門閉古色落日鳴哀湍
我行倦前征憩息天風寒
下臨羣壑陰仰視星宇寬
攬衣不成寐脫劍膝上彈
劍歌有餘情豈為行路難

登金山寺

江近海勢闊中流孤島分
化城若浮出鐘梵空中聞
真僧何方來於茲巢白雲
魚龍護法界日月棲山門
而我

泛梗蹤偶因滌器紛真源杳莫測積氣長氤氲一灑甘
露言便覺蘇焦焚棲身恍圓鏡永絕諸漏音

發龍江和同官王洪之作時使節之長沙

朝發龍河津駕言適南楚顧茲念王程臨流不遑處是
時長風來遙空霽疎雨羣山坐滅沒千里但延佇豈不
懷友生幸此息辛苦歸命諒有期毋為惜車阻

舟中望匡廬

茲山東南美植立雲霞中九疊縈秀色萬古青茸茸我

懷志靈奇絳帆喜相逢林端望飛瀑天際數雲峯香爐
紫烟滅玉鏡澄湖空飛翠落巾袖毛髮疏天風顧此逐
行役無由訪仙蹤長詠遠公傳坐憶東林鐘

登黃鶴樓

迢迢江上樓飛構梯層穹黃鶴何年來結巢白雲中仙
人整羽蓋一往無遺蹤瑤笙紫河車瀟灑餘天風至今
啓重關呵守虎豹雄雕簷敞白日闌檻標晴虹我因駐
旄節登攀興何窮神行萬物表目送雙飛鴻依依烟際

帆遠落三湘東霜清楚天碧樹盡荆門空長辭愧禰生
高興懷庾公落日下樓去烟水青濛濛

游浯溪錄呈陳司馬及同登諸公

客舟久探奇興落浯水上牽蘿豁遠目所至窮異狀是
時天宇晴物象自清曠烟開楚山斷千里彌一望遐延
極覽眺近歷飽搜訪層崖劃中開峭壁摩萬丈顏公英
烈姿元叟士林仗文辭金石奏字畫蛟龍壯伊余抗塵
容所志在清賞孤雲寄微蹤獨鶴引空杖豈無千載懷

亦有高山仰同游二三侶相與情頗暢芳蘭薦山庖林
瀑灑行帳醉揮紫霞觴亂落白雲唱歸舟漫容與潭月
吐雲嶂幽興任時違心遠覺神王但云諧斯遊何以畚清
貺

全州道中

夾道松栢千株
前守章復所植

全南走百里碧澗緣幽岑躋險屢得勝曠望清煩襟道
傍茺茺松誰氏甘棠陰聞有章大夫昔年茲撫臨政循
俗云變世遠澤尚深顧茲手植繁蒨沃猶至今天長日

色薄風靜雲滿林我行念徒侶苦被名跡侵畏影且息
陰避喧聊洗心據牀久兀傲思奏丘中琴知音何寥哉
猿鶴空哀吟

南海登粵王臺

載酒豁清眺嘯歌粵臺巔粵臺久寂寞海色空蒼然荒
城南斗外碧草春風前雲木隱暝色落日哀啼鵲緬懷
全盛日萬里恢疆蹕疏封赤社大列雉南溟專茲臺一
何高顯視如控弦運世神物改代往陵谷遷千金買辨

士古瓦空寒烟惟有山僧來此地開梵筵諷唄發深夜
鐘鼓羅諸天觀物理則如倏往猶千年誰將峴山淚為
灑南雲邊

南海郡庠宴集書贈董郡博

高堂輟絃誦秩秩敷賓筵朋來何雍容對此方穆然勸
酢禮有加陟降容無偏芳蘭發中座品物羅庶邇是時
海雨至須臾遍南天夏日如涼秋清風灑軒懸酣情久
已暢秉德良益虔用言賦茲什以代伐木篇

龍州道中

微生易為役遠節恒自持夙興戒前征萬里投南陲迢迢古龍州山猿雜羣夷浮雲翳兩曜衆壑昏陰霏由茲望明都尚隔天一涯淹留暫停騎促刺心不怡所愧子桑戶中林人見稀

交趾贈節鎮黃司空

補袞美周甫分岳咨堯牧晤言懷古人於茲緬芳躅圭璋信偉器麟鳳豈凡族天南一星明萬里忻共矚竭來

炎海濱真拓古輿服懷柔心為勤撫馭令尤肅政淳回
澆漓仁遠起類伏鯨濤安中流烏語變華俗頌令天地
春浩蕩被陰谷伊余慕光華幸此近膏沃衆中覩節鉞
丰采朗如玉天狼晝已墮神珠夜當復願言歌德音吉
頌愧清穆

交州病中喜林伯禎大叅歸

孤館抱餘瘵殊方積沈憂況茲風雨交薄暮來颼颼中
夜夢九遷上國魂獨遊豈無同心人曠望阻林丘驅馳

王事勤未得休戈矛旦坐念睽違此會良悠悠忽聞擁
前麾載見迴輕輶欣遂懷始開晤言疾徐瘳須臾笳鼓
悲耿耿星漢流餘情寄長劍激烈何能休

出雞陵關

手麾白羽簷凌晨出夷關夷關春始開行旅多歡顏笑
掬清澗流為洗瘴癘殘浮雲引征佩共結輕陰還前登
忘險疲憑高眺林巒却憶征南幕溟濛海霧間

宿烏岩灘

扁舟宿層灘灘漲夜來雨飄飄遠客情寂歷榜人語登途畏虎跡突瀨逢鱷怒東山尚沈冥推蓬幾延佇

蒼梧道中

驅車九疑道獨鳥東南飛看山不覺遠秋雲生我衣深谷走羣籟半岑明夕暉中林有蘭茝薄暮空芳菲

道上觀別者

完山有鳴鳥其聲一何哀死別徒已矣生離當告誰聖人登總期玉燭耀九垓三殤無怨苛四表罔不諧爾行

獨何之萬里觸炎埃五嶺表異服更邈天一涯毒蟒噬
人肌膚露冒草萊荷戈方前馳夙夜敢怠哉去去逐行
侶悠悠念中懷心存長相思身沒淪死灰願同六月息
倚輪為徘徊落日雲始暝長嘯悲風來

曲江謁張文獻祠

停舟曲江許弔古謁遺祠巖巖始興公遺澤芬在斯堂
傾風雨萃碑斷苔蘚滋芳春奠行旅落日歸文狸唐宮
昔全盛衡鑒方獨持弼諧展嘉猷讜論非詭隨離離朝

陽鳳粲粲補袞絲側聞卧病後九廟烟塵飛漁陽突騎
來衣冠辱塗泥信知砥柱功用舍同安危昭陵鐵馬空
仙李祚久移維餘蘭菊存千秋恒若茲我來薦微誠再
拜當前墀顧瞻廟貌間風度猶可希武溪何淫淫蓉峰
亦巍巍只今相業隆孰與前修期臨風一長嘆山雨來
霏霏

過清遠峽

兩山夾飛流曲折始東走排宮殿崩雷出峽去愈驟商

人數畏津漁子駭奔溜回瀾乍窺淵迸瀨亂洩竇上當
羣石爭下及衆川湫勢齊龍門險雄長碣石右惜哉神
禹功莫畫遠莫究遂令五嶺南別與萬靈關我行一停
舟適值風雨候崩騰心為徨滉瀟目已瞶篙師戒前征
薄暮不敢逗開蓬訝驚湍宛若羣鷺造乃知造化神茲
實亘宇宙三復忠信言呼酒聊獨侑

舟移豫章高士亭址下寄新喻文學潘時彥

雲水極杳靄一樵東南歸青林相掩映白鳥烟中飛新

蒲乍隱舟漫流侵夕磯偶尋高士宅忽悵故人違搖曳
鳴玉琴誰云出處非明發引前望五老收陰霏

幽中送張用剛還晉安

海水天際落北風捲蓬根愁烟結遠思薄暮空紛紛握
手子不留驅車出都門離筵楓葉下客路猿聲聞借問
此日還何時鷗鷺羣舟移九曲棹樹隱重關雲笑我鸞
鶴安久閉樊籠春烟霞有歸夢為爾飛吟魂

閩中十子詩卷二十三

欽定四庫全書

閩中十子詩卷二十四

明 袁表

馬熒 編

王檢討集三

七言古詩

長歌行

有淚莫泣鮫人珠有足莫獻荆山玉赤心徒使按劍猜
至寶翻令笑魚目千金蹈海稱達人五噫出關西去秦

負島不復遇知已空歌白石南山春楚卿棄相復何有
於陵甘作灌園叟雜縣偶集魯東門惆悵胡能事杯酒
長風蕭騷百草殘長缺悲歌涕汎瀾金臺駿骨久已化
瑤水風波不可攀畏途羊腸能折軸緘書為謝雲間鵠
海上三花久負期醉歸謾托平原宿

將進酒

故人手持金屈卮進酒與君君莫辭仲孺不援同產服
孟公肯顧尚書期當歌激風和結楚吳姬白苧莫停舞

黃河東走不復回
白日經天豈能駐
田文昔日盛經過
朝酣暮樂艷綺羅
高臺已傾曲池廢
祇今誰聽雍門歌
我有一曲側君耳
世事悠悠每如此
子雲浪作投閣人
賈生空弔湘江水
春風南園花滿枝
莫待秋風搖落時
東山笑起徒為侶
乘時莫負高陽池

古別離

將軍嫖姚北伐時
漢兵五道同出師
使者三河募豪傑
材官半是幽并兒
鴈門燕郊一丈雪
交河蹴踏層冰裂

鳥旆遙翻青海雲蛇弓亂射陰山月青海陰山若箇邊
芳閨桃李為誰妍三年玉筋頻啼處萬里金釭尚未旋
機中錦字織成久謾訴相思別離後鴛被春來夜夢多
龍沙秋盡寒川走飛書昨夜入咸陽詔更徵兵屯朔方
苦戰匈奴圍未解鐵衣著盡邊庭霜邊庭風霜那可度
望斷關山不知處衣寬詎惜鸞帶賒樓高枉盼鴻音暮
自古封侯燕領身肯思中婦鳳樓塵但令踈勒風烟掃
甘作陽臺雲雨人

怨歌行

絃奏鈞天素娥之寶瑟酒斟流霞碧海之瓊杯宿君七
采流蘇之錦帳坐我九成白玉之仙臺臺高帳暖春雲
薄金縷輕身掌中托結成比翼天上期不羨連枝世間
樂歲歲年年樂未涯鴉黃粉白淡相宜卷衣羞比秦王
女抱琴肯賦宵征詩參差雙鳳裁筠管誰信韶華有凋
換魏園未泣龍陽魚漢宮忍聽長門鴈長門蕭蕭秋影
稀粉屏珠綴流螢飛苔生舞席塵蒙鏡空傍閒堦尋履

綦宛宛青陽日將暮惆悵君思棄中路妾心如月君不知斜倚雲和雙淚垂

行路難

倚劍且勿嘆聽我行路難世途反覆多波瀾焦原九折未為艱君不見漢謠斗粟歌未闌長門一夕秋草殘骨肉之恩尚如此何況他人方寸間又不見絳侯身榮應繫獄賈生終對長沙鵬功成更覺小吏尊才高寧避明時逐所以赤松子遠赴中林期誰能吳江上見笑鴟夷

皮驪龍有珠在滄海勸君逆鱗勿撓之子推介山下屈
原湘水湄當時杓鑿自不量至今憔悴令人悲行路難
難為言滄浪一棹且歸去長安大道橫青天

少年行

千金換寶劍短髮綴長纓銀鞍照紫燕颯沓洛陽城洛
陽城中足年少陌上相逢開口笑按劍長歌猛虎詞彎
弓直上呼鷹道歸來買笑何所驩白日擁擲夜未闌百
觴每共孫臏醉一飯羞從漂母餐長裾曳地小垂手短

笛橫吹折楊柳一曲臨風意氣生
珊瑚擊碎亂從橫
春來秋去只如此
五侯七貴為知己
却笑侯嬴空抱關
白首夷門不暫閒

短歌行

東風吹花墮錦筵
綠楊半蹕青樓烟
主人自為鵲鵲舞
小妓更奏鴛鴦絃
當杯入手君不醉
落日已在西山巔
短歌一拍心茫然
請看明鏡高臺上
何須白髮悲芳年

遠遊曲

焦螟栖蠹睫鯢鵬運天淵由來小大各有適人生出處
同所然蘇秦未佩六國印一身落魄誰相問相如去蜀
謁武皇高車駟馬生輝光以茲感慨慕昔人起秣吾馬
膏吾輪出門仰天發西笑寧辭斷梗隨風塵朝趨楓陛
謁明主夕掌蘭臺作貴臣自謂生平有奇遇從間因獻
甘泉賦雕蟲小技何足誇白日天光屢迴顧朝回勅賜
飛龍駒玉勒光輝驕道隅雕筵象几進綺食不但醉飽
同侪儒君不見漢家主父寧久貧買臣無復恒負薪當

時妻子笑相薄一朝四海來相親閔生寂寞困藜藿
期惟悴蒙埃塵請君試聽遠遊曲何必長為畎畝人

塞下曲

君不見鴈門九月風如刀筋強蹄健羣蠻驕邊庭列障
走烽燧攬槍夜出天山高陰磧茫茫走千里刁斗聲沈
塞雲紫重圍未破殺氣昏萬衆同呼士心死起看壯士
皆裹創援桴鼓之氣益張三軍奮迅一敵萬沙場血染
天為黃自此匈奴知姓字漢家盡雪穹廬恥可憐白首

未封侯一片雄心向誰是

君馬黃

君馬黃我馬白二馬同嘶出南陌南陌東阡夾渭橋馬
行平地似青霄羈金絡月人皆羨振玉鳴珂意自驕朝
出相隨暮相逐可憐人馬皆如玉如何與君生別離君
馬東行我馬西欲知後夜長鳴處羞對鴛鴦一萬蹄

長相思

長相思乃在瀛洲之上碧海之涯閨風蓬壺相蔽虧琅

玕碧草何離離安期偓佺空有期五龍起舞鸞驚隨祥
風化日同熙怡碧桃笑花春滿枝鸞驂鶴馭同遨嬉我
獨何為困羈離弱水三萬不可飛長相思心為悲

醉歌行畲鄭五定

人生三十古所立嗟余落拓竟何有眼中萬事皆等閒
帳下一經空自守揚雄寂寞人皆羨長卿憔悴誰相偶
五陵西上事已非百粵南歸歲應久侯門無分曳長裾
別墅閒來閉虛牖感懷徒使壯士悲託交何處論心舊

與君一見即傾倒握手相驩情頗厚意氣能凌豪士前
風流肯落當時後每於結客散黃金縱令負郭無百畝
白社吟來落木秋青山醉倒芳尊酒知己終憐水上萍
年光暗擲門前柳惟有長歌一片心此日贈君君識否

贈吳六

少年結客遊五陵布衣落魄喜談兵是時氐羌殺主將
邊庭一夕烟塵生當筵意氣許君死飲血報仇為知己
一生猿臂挽兩弧三尺魚腸走千里窮秋絕漠羽書飛

輕身陷陣解重圍眼看欃槍中夜掃手擒虎兇轅門歸
帳下三杯躍紫燕衆中萬歲瞻白衣功成幕府失姓字
扁舟歸釣滄江湄爾來時平復何事萬事蹉跎付杯酒
昔年蓮鐐吐星鉞今日茅茨閉虛牖丈夫感激驚心魂
平原食客有誰存臨風夜夜弔孤月長歌擊筑聲俱吞
閒來遇我何所為未言往事先淒其鬢毛淪落已如此
心跡悠悠誰復知

送陳煥

池上百草綠春城黃鳥吟玉壺清酒與君別青山去後
空雲林問君此行何慷慨一嘯揚眉起滄海須使功名
及早成莫教綠鬢流年改拂劍酣歌四座傾共看仙籍
快登瀛上林奏賦久相待宣室求賢方未寧縱醉臨歧
不知晚落渚蕭蕭送歸鴈別路雲程兩地分目極烟江
去帆遠

寄答黃伯亨

我馬從東來君車正西去有似風吹海上雲天際無心

忽相遇與君相遇即相知
瀝膽輸肝無復疑
虞卿豈顧
雙白壁平原輕擲二美姬
狂歌一斗酒共醉六屏月
拂曙登古臺慷慨與君別
君行五嶺南我阻三山道
何處我思君天涯但芳草
昨朝鴻鴈下江烟
銜得君書置我前
開緘拂冰雪千里情灑然
念昔與君多意氣
相期堂作桃李妍
駿生立堂下叔向知其賢
袁宏發朗詠謝公
遂回船丈夫一語苟有合
何必結交窮歲年
我有古干將羞澁久棄捐
寧甘困泥滓恥為兒女憐
君有長歌向

余寫我將古調為君宣月明洞口鳴風泉清商一曲付
哀絃雲生麋鹿可為侶紛紛薄俗何其偏

贈李道士

太樸已散玄風澆函關紫氣騰赤霄爾來蓬壺幾清淺
孫枝秀出何飄飄君從何來載雲輶仙裾搖曳凌晨朝
紫皇天上吹碧簫左揖羨門右松喬東折君華壽西母
麻姑綠鬢顏未凋有時馭列缺攜招搖頰降昆吾丘飲
我長生瓢霓為鈴兮風為馬白日羽翰何脩脩吾將挈

日月以觀乎無始與夫子兮遊遨

西亭夜送林六敏還山

今夜西亭月秋風梧葉涼故人發孤興別夢遶林塘浮
世相逢心草草羨君拂衣一何早百畝風泉繞桂枝歸
去南山跡如掃南山松桂北山雲飲澗穿雲麋鹿羣窻
間明月但高枕洞口飛泉長對門知君自是悠悠者何
須叩角歌長夜鄭谷年來秋草稀鹿門誰伴白雲歸君
行好覓赤松子余亦將紉薜荔衣

送吳生赴閩中

吳生落魄志不羈世上悠悠那復知
長希一代賢豪士不學千金遊俠兒
三十窮經坐環堵四壁蕭條但榛莽
客路偏驚季子裘故人誰薦揚雄賦
酣歌擊筑不堪聞中宵起舞思紛紛
功名且付杯中酒富貴從輕天上雲
平生高懷有如此青眼論交見生死
俗流未足論升沈丈夫應須有知己
茲行遠遊何時還西窺太華浮雲間
也知局促蓬蒿底終然莫掩沖霄翰

宿桃溪方翁家贈別

清溪一帶緣桃花春來水上流胡麻東風尋源泛瑤棹
雲中遠見山人家於茲水木相含景裊裊松杉亂天影
少焉林壑衆籟鳴巾舄飛來片雲冷二三老翁住東陂
薜衣霜雪垂兩眉自言入山歲已久不知人世今何時
傳聞有客驚還喜共薦清泉飯松子烟林霧篠不逢人
碧草苔花應滿地問余何事在塵間那似山中日月閒
澗戶聊同魚鳥醉石牀常伴雲霞眠乍逢靈境真堪悅

區緣未謝還成別別後重來定幾時夢繞溪邊綠蘿月
題深溪草堂

草堂住在深溪裏四面窻開玩清泚空翠長浮半壁陰
涼颼時傍虛簾起雲收月墮吟幌白雨過苔侵釣磯紫
心閒野鳥自忘機客至談玄聊隱几高情澹蕩付琴尊
有時落魄不冠履已知入境得蓬丘恍若漁舟問桃李
滄洲有約在投竿白首何心懷帝里祇今方憐世態薄
逢君況值丘壑美荷衣蕙帶或可紉也向溪頭拾芳芷

聽琴歌送方氏逸民歸天台

嶧陽孤桐節風雨中雙鳳幽修語一辭爨下登高堂
微向黃金思何苦初彈一曲南風生端拱垂衣虞舜庭
悄然再鼓神欲往美人頤而結遐想須臾改調絃亂鳴
引宮刻角流新聲泛如陽春激白雪澹如綠水涵秋清
羨君操成有如此十指游心在千古戶外翩翩鸞鶴翔
松下傚傚鬼神舞世間箏篴徒紛紛可憐此調誰能聞
江湖寥寥少知己抱歸獨卧空山雲

送友還劍上

手把一尊酒送君白下門
秋風官道傍落葉何紛紛
念我辭家久為客京華一日幾人別
茲晨慷慨復送君
令人却憶故山雲
君家舊住劍溪上
門外雙峯宛相向
雲屏九曲倚醉過
青山別後近如何
君行漫浪不須久
舊業荒涼風雨後
會余得買南歸航
蘿逕苔磯一相候

賦得釣龍臺送友人還閩

九原鹿跡何茫茫
五星東井熙炎光
無諸功成裂漢土

組練三千還故鄉當時築臺青冥中間來垂釣滄江龍
屠龍技成去不返至今百粵山河空臺外蒼山落平楚
臺下江流自今古野水荒烟古戍寒落日精靈尚來去
過客憑高眺遠鴻可憐何處聽歌鐘愁雲偏結謝端渚
海月長懸薛老峯故人舊隱螺江側曾共吟秋弔陳跡
此日南歸興不窮別後登臺好相憶

劍潭歌送董大令還晉江

兩山何來勢崢嶸山下碧潭秋水清昔人寶劍化神物

至今白日風雷爭送君南行感疇昔秋深擁棹蛟龍窟
醉起登艫牛女紅涼夜擊汰精靈出千里寒流赴海深
宦游同到海天濱明朝霄漢還相會未必牛刀嘆陸沈
賦得龍江送蕭御史

君不見龍江水流東到海天塹由來知幾代三月春潮
繞帝城噴雪鳴濤走澎湃往事流殘落照中六朝遺跡
恨無窮清時不用限南北萬國梯航此日通烟開目極
澄波眇海門一點孤帆小勢吞九派落雲間雄浸三山

出天表江上潮來一送君中流宛見繡衣新青年好遂
澄清志莫羨當時擊楫人

送陳將軍還鎮三河

紫髯將軍身七尺早拜金吾未三十臂挽雕弧二石強
腰橫寶劍千人敵曾隨驃騎過祈連破寇平蕃功最先
直向交河斬兇醜肯教烽燧照甘泉名高飛將傳異域
氣凌屬國雄燕然百年思刷浚稽恥萬里曾屯充國田
邇來移鎮三河久馬上黃金垂紫綬偏裨皆為六郡英

賢豪不數雲中守平原草色獵騎還鴈門雪盡春歸後
邈靜無傳紫塞烟客來但醉芳尊酒良時躍馬獨朝天
闕下相逢思藹然久知公子能虛左却憶將軍恒在邊
錦帶紅纓士如虎明日都門仍出祖節鉞翩翩望不見
惟見雲臺天尺五

送楊世顯還溫陵兼寄胡郡守童將軍

八月江南鴻鴈翔蒹葭夕露凝如霜典衣沽酒不成醉
遊子此時思故鄉故鄉別來在何許秋風落盡桐花樹

歸夢長懸嶺嶠雲客衣久翳秦淮雨以茲慷慨賦式微
都門祖帳送斜暉舟從揚子江頭發路指嚴陵灘下歸
壺公片月生滄海紫帽嵐光拂微翠溫陵太守蘭臺客
往日詞林見顏色虎頭將軍懸轆轤金尊為爾酒剩沽
到時相見即傾倒為我問訊今何如

贈遼陽僧慧峯

上人出家絕世緣少小入山今幾年悟得真空無住著
手探濁海神珠圓草衣百結幽巖裏晝拾松花飲泉水

野性無心狎澗廩大法時譚聽山鬼遼海蒼蒼接遠天
居人漁獵厭腥膻山中有僧誰解識長日安禪祇愛眠
此生自笑機緣薄欲接微言解羣縛昨夜中峯禮白雲
惟見諸天寶花落

古劍行贈周辰

殺氣貫斗牛精光何陸離風胡不可遇千載令人悲憶
昔干將初鑄日五夜龍池飛霹靂秋水芒寒鷗鵝膏虹
光鋸吐蓮花質當年曾聞易水歌荆卿不濟當如何從

來相隨赤帝子颯颯秋郊泣嫠鬼乃知神物用有時風
雲變化誰能知祇今蕭條鐔水上白日往往蛟龍飛俠
客相看魂欲死一片雄心許知己別來夜夜匣裏鳴憶
君清淚如鉛水為君摩挲君試看劍歌有曲君莫彈從
來烈士皆如此茫茫萬古悲風寒

東湖春意圖為樵門李姚生題

鴛鴦湖上春風軟柳絲無力桃浪淺暖烟籠碧水如雲
纖纖細草苔香滿滿樓卷畫大堤傍羅綺晴嬌綠水鄉

冰絃玉柱新調呂半蹙雙蛾倚淡粧
鴻鵠雙雙點晴霧
百勞東飛燕西去紫泥誰染天上春雲絨
留得相思句
日暮相思枉斷腸綠波千里共悠揚
龜甲屏風花夢曉
一抹修蛾鏡中小


王帝家詠梅花燈

并娥翦素鏤秋水蘭燄傳春破
瑤蕊粉屏射蠟搖珠光
的歷冰魂廣寒裏嚴城畫角聲
咿咿義馭漸軋轉桑枝
芳心暗逐烟燼落玉壺味冷沈烟薄

凌歊臺懷古

朝發石頭渚暮宿黃山道攜酒眺古臺離離但烟草憶
昔茲臺何壯哉宋祖離宮臺上開臺前寶樹入層漢臺
下炎歊隘九垓楚山望盡蜀山出雄跨全吳勢凌突
欲吞銅雀俯中原不數黃金貴奇骨三千歌舞宿雲端
公子王孫往復還秦關捷書不再返鼎湖飛龍誰復攀
繁華一旦乃如此寂寂荒臺秋色裏往事徒悲禾黍場
殘碑半墮滄江水滄江水流去不迴空陵劫火變寒灰

欲將霸業問行客黃山落日清猿哀



閩中十子詩卷二十四